

Մարօն նստեց իմ մօտ, իմ ձեռքը առեց իր երկու ափերի մէջ, եւ դրեց իր ծնկի վրայ: Նա ուրախ, որպէս միշտ, սկսեց պատմել՝ թէ առաւօտեան իր հօրից իմացաւ, որ իմ առողջութիւնը վատ էր. նա վազեց դէպի եղբօր ագարակը, տեսաւ, ես այնտեղ չկայի: Այնտեղից շտապեց դէպի արտը, Հասօի մօտ. եղբօրից այսքանը իացաւ, թէ նա տեսել էր ինձ կէսօրից առաջ, բայց չգիտէր, ու՛ր կամ ո՛ր կողմը գնացի: Նա երկար որոնեց ինձ, մինչեւ արեւը մտաւ եւ օրը մթնեց. յետոյ նրան հանդիպեց մի բոշայ կին, որ ասաց, թէ տեսել էր ինձ «Քանդոած մատուռի» մօտ:

– Դու ճանաչում ե՞ս այն կը նկան, – հարցրի ես:

– Երկրորդ անգամն է, որ տեսնում եմ նրան, – պատասխանեց Մարօն:

– Առաջին անգամն ե՞րբ էր:

– Երկու տարի առաջ: Ես տեսայ նրան միեւնոյն հագուստով, որպէս այսօր, էլի այն փոքրիկ երեխան իր հետն էր, որին այսօր տեսայ: Ինչ լաւ երեխայ է, Ֆարհատ, այնքան սիրտս սիրեց նրան, որ բռնեցի երեսը պաչ արի: Ախար մե՛ղք է անօրէնի երեսը պաչ անելը. նրա ճակատին մեռն չէ քսած. բայց ես նրան պաչ արի. նա այնպէս լաւ երեխայ էր:

– Որտե՞ղ դու տեսար նրան երկու տարի առաջ:

Մարօն նկատելով, իր պատմութիւնը հետաքրքրում էր ինձ, շարունակեց.

– Ես տեսայ նրան այս ձորի մէջ, այս մատուռի մօտ. նա խօսում էր Կարօյի հետ: Ի՛նչ էր խօսում, ես չիմացայ, նրա համար, որ նրանց լեզուն չէի հասկանում: Քանի օրից յետոյ Կարօն անյայտացաւ մեր տանից. մենք չիմացանք թէ ուր գնաց: Քանի տարի էր նրանից ոչ մի լուր չունէինք: Կարօյի գնալուց յետոյ, այն կինն էլ չերեւաց: Այս անգամին, երբ Կարօն կրկին լուս ընկաւ, բոշան էլի ման է գալիս մեր կողմերում:

– Այն ժամանակ Ասլանը եւ Սագօն Կարօյի հե՛տ էին:

– Չէ՛, նրանք չկային: Այս անգամ ետ դարձան միասին: Երկու շաբաթ է, ինչ որ եկել են:

– Դու այսօր Կարօյին չե՞ս տեսել:

– Ես քեզ ասացի, որ տանից դուրս եմ եկել առաւօտեան. մինչեւ հիմա էլ սար, ձոր չեմ թողել, քո ետնեն ման եմ եկել: Հիմա ինչպէ՞ս է քեփդ, դու ողջ օրը հաց չես կերել. ի՛նչ գիժ տղայ ես, Ֆարհատ:

– Կարօն լաւ տղայ է, այնպէս չէ՞: